



細黃毛仔

細鴨子正孵啊出來，就在竇項對厥姆个肚底探出頭來看看啊！

其他个大鴨仔知得有細鴨子孵出來，跔等歡喜啊走來鴨嫲竇脣嘰嘰噉噉，有个人看著佢歸身仔淦黃个毛色，就喊佢「細黃毛仔」。

「細黃毛仔！細黃毛仔！」大家人佢一聲、你一聲，這鴨寮園仔裡背又熱鬧起來啦！毋過，細鴨子看著恁多人圍等咁，共快屏在厥姆个肚底，分該兜大鴨仔嚇啊毋敢再探頭出來。鴨嫲毋盼得个用厥翼胛揞等，緊同佢講：「膽膽大、膽膽大，無嚇著，蓋會大。」

一、兩日過後，鴨嫲帶等佢去園仔裡背絡食。大家人看著細黃毛仔就緊喊：「細黃毛出來咁！細黃毛出來咁！」

鴨嫲一趔一翹个尋看啊有麼个好食，細黃毛仔跔等厥姆走，佢心肚就驚該兜大聲喊佢細黃毛仔个鴨仔會欺翕佢。其實大家人根本就無行兼佢，就淨遠遠仔喊等：「細黃毛出來咁！」

細鴨子實在毋合意大家人喊佢細黃毛仔，尤其係聲說過大兜个，佢見聽啊著就驚。下後佢看著自家个毛色確實同人个無共樣，佢更致覺著大家人係在噓佢。佢仰仔都毋歡喜人家喊佢細黃毛仔。

時間一日一日過，細黃毛仔个幼毛定定仔換做有毛管个烏毛咁。厥毛色烏啊在日頭下晒，看起來就金若若仔。跔等厥毛色轉烏，鴨嫲就同佢講：「你轉大人咁，係教過你仰仔絡食、仰仔同大家共下生活，續下來个日仔愛自家過。」

鴨嫲同細黃毛仔講過後，就擲長厥蛤蟆脰，同大家人講：「細黃毛仔轉大人咁！細黃毛仔轉大人咁！」

「細黃毛仔轉大人咁！」大家人聽到也跔等大聲喊，每一個人歡喜啊緊撥翼！顛倒係細黃毛仔呆呆企等，毋知愛仰仔來配合大家人。這時節大鴨公行到厥面前，同佢講：「後生仔，愛同大家共下生活咁！鴨寮裡背个事情，係毋曉得个，大家都肯同你揸手。」

無幾久，又有細鴨子孵出來咁。大家知得過後，就有人擲脰大聲喊：「細黃毛出來咁！細黃毛出來咁！」接等就有人提醒佢，係有細鴨子孵出來，大家就會喊佢細黃毛仔。這係用來同大家人講，莫去攏佢等子哀生活，好分鴨嫲有時間教細鴨子絡食同生活。這下，佢正知得，原來大家毋係惱佢，也毋係噓佢。

定定仔，佢轉身做大人，開始學做竇、孵卵。有一日，有細鴨子在厥肚底蠕蠕動，佢做哀咁。就在厥細仔仔探頭出來該下，佢又聽著有人喊：「細黃毛仔。」

這時節，已經做哀个細黃毛仔開開厥翼，揞等厥細黃毛仔，柔柔仔講：「膽膽大、膽膽大，無嚇著，蓋會大。佢等毋會欺翕你啦！佢等係在歡喜又有細鴨子出世，正會恁仔，毋使驚！」

作者：陳志寧

☆詞彙學習☆

【嘰嘰噉噉】gi^ˇ gi^ˇ giâu^ˇ giâu^ˇ：吱吱喳喳，指吵雜的聲音。

【淦黃】nem^ˊ vong^ˇ：黃澄澄的。

【共快】kiong kuai：趕緊、快點。

【膽膽大】dam^ˋ dam^ˋ tai：字面義為「膽兒大」，是安撫受到驚嚇的孩童的用語。

【一趔一翹】id^ˋ fung^ˋ id^ˋ kieu：走路搖搖擺擺的樣子。

【欺翕】ki^ˊ hib^ˋ：欺負。

【更致】gien zii：更加。

【金若若仔】gim^ˊ na na e^ˊ：金光閃閃的。

【幼毛】iu mo^ˊ：細毛。